

沈忠敏公龜谿集

沈氏家藏書

沈忠敏公龜谿集卷第六

表

謝除御史中丞表

一節造朝已玷持書之舊十行錫命遽叨執法之榮
危惴上陳溫言狎至覲顏就列攬涕知慙

中謝臣

竊

以風憲之司政事所繫臺綱正則百度舉國論定故
群慝消專務抨彈寧容畏忌必也深達治體更練事
情本之以仁厚愛物之誠加之以正直事君之道身
任衆怨屹如柱砥之鎮頽波言切上心沛若巨魚之

縱大壑俾率其屬克大厥官伏念臣多病早衰少徒
寡與叨蒙異睠祇罄孤忠危哉樓子之言將共扶於
公道甚矣汲黯之轡嘗自觸於駭機一去天墀甫更
歲籥召從下澤歸覲清光心驚伏馬之鳴初疑昨夢
目駭臺鳥之集復守故棲空貽尸素之譏敢有超遷
之望忽傳明命驟躡峻班寵過食浮莫遂循牆之避
位高責重更深臨谷之憂此蓋伏遇

皇帝陛下自誠而明能哲而惠群策屈群力並輯謀
猷之良公事當公言兼收聽納之美察臣論每專於

國計憫臣志獨緩於身謀出自親除就加器使臣敢
不益堅素守仰稱殊私明目達聰方廣求言之路摩頂
放踵盡是報恩之身

謝賜對衣金帶鞍轡表

衣裳出笥加寶帶之爛然觴輒在庭傳華韉之沃若
叨光焜耀顧影徘徊

中謝

伏念臣才不逮中識非致

遠念起家之寒甚驚卷髮之班如早對妻孥嘗動王
章之泣晚懷鄉里寧忘馬援之言頃荷宸慈再紆召
節故里靡容於懷絳舊班俄俾於乘驄寔冒寵私每

踰分願此蓋伏遇

皇帝陛下仁深約己禮厚好賢藩飾庶邦不待無衣
之請命駕馭多士使知有駟之在公特示匪頒以昭
睠遇臣謹當依附日月黽勉夙宵負赤芾三百之譏
偶先結綬竭駑馬十駕之力敢後著鞭

謝除吏部尚書兼權翰林學士表

柏臺五院之游屢經冒進蘭省六卿之列首玷超除

更被詔函兼陪辭禁寵榮併集愧懼交深

中謝

伏念

臣涉學迂踈起家寒瑣寸心許國但知直道而行片

言得君肯借游談之助悼奇節之未有慚它技之倚
無祇以孤忠數叨異數擇笏而賜李絳獨蒙曲誤之
知前席而見賈生每奉清閑之燕念殊恩之難報宜
嚴譴之必加豈謂忽拜明縉驟躋華序從事銓衡之
地力已弗勝寓直翰墨之林才將焉彊靡容俯僂采
積戰兢此蓋伏遇

皇帝陛下叡知先知英武大度勤於接下圖宣王復
古之功寬以用中得成湯立賢之道矜憐狂直之末
躡寘峻髦之先臣敢不外竭罷駑中存丹赤上山濤

之啓事何敢不公草陸贄之詔書終憂靡稱

謝兼侍讀表

軒墀載橐備甘泉之近班帷幄執經紹金華之絕業
皆極儒臣之選悉繇睿主之知銜恩有加收涕無所

中謝

伏念臣資材驢甚誦數缺然學者以聖王爲師
歎清光之難望春秋乃天子之事懼微言之罕通豈
圖申錫贊書更侍便坐討論三傳之旨叅陪五學之
游莫遂循牆終宜避席此蓋伏遇

皇帝陛下道侔天運德懋日躋左右惟其人輯搢紳

於燕閒之際終始典於學脫筆削於廢錮之餘致誤
簡知與叨紬繹而臣丹心獨在華髮半空因事獻言
雖欲殫千慮之得斷章取義豈能副多聞之求僂僂
以還跼蹐而已

謝除職名宮觀表

叨榮帥閩甫回南紀之行養疾祠宮復忝西清之直
荷大恩之委曲撫孤跡之凌兢形影自隨涕洟交溢

中謝

伏念臣家世寒甚質狀耿然不虞朴拙之易危
殆至迂踈而難合祗憑直道屢發狂言每期特立而

獨行是致多仇而少予向紓三組本繇上聖特達之
知寢閱九遷彌處衆人必爭之地了無裨補積有罪
愆間蒙賜對於燕朝數巧投閑於散地迨膺重寄自
列初心何敢徇於身謀誠恐乖於國事旣寬威命亟
下俞音望蓬萊之昔游雖云引去指柴桑之舊隱儻
遂來歸祿賜尚豐寵名益侈此蓋伏遇

皇帝陛下皇明並照聖度兼容馭衆得官施之宜圖
功乘事幾之會憐臣蠢愚有守蓋嘗備腹心之臣察
臣緜弱無堪不復責爪牙之事故捐異渥以佚殘骸

臣敢不追悟昨非退安素分魂煢煢而去國莫效餘忠思翼翼而慕君庶存晚節

賀冬至節表

律隨候應驗一氣之潛萌卦以類通知七日之來復

中賀
恭惟

皇帝陛下龐恩浹物剛德御時圖回每惜於分陰恢復靡忘於尺地法宮展案將陳亞歲之儀神筴延年必享後天之福臣屏居故里阻預周行測舜日之長徒傾葵藿望堯雲之近分隔泥塗

謝知鎮江府到任表

奉祠真館本避寵而投閑試守名邦忽叨恩而任劇
已布哀矜之詔庶銷愁恨之聲下聽民言皆知上德

中謝

伏念臣衰羸多病朴拙少文奮身無半面之交

最爲孤立遇主有一言之合亟被深知向塵耳目之
司卽受腹心之託雖觸犯忌諱每恃包容然排擊姦
邪多招仇怨而臣忠在許國義難徇人迨陞銓總之
曹采積顛隳之懼稍求散地俄奉俞旨一自去於朝
班已再更於年所形潛窮谷方追麋鹿之游夢入修

門空想鵲鸞之侶敢圖簡記復玷使令矧此凋殘之餘居然控扼之要江山猶昔雖云襟帶之存城郭已非但見丘墟之積志徒策勵才豈堪任此蓋伏遇皇帝陛下罷使群才陶成庶類念臣進繇親擢姑務保全於始終察臣退在自安更令揚歷於中外肉骨之恩逾厚糜軀之報益堅誠恐技窮敢辭責重謹當奉承德意勞還緣晦之民憑藉威靈和輯扞邊之士粗能辦職猶覲乞身

謝除吏部尚書表

擁麾臨郡靡聞治狀之優曳履還朝忽拜召音之迅

班聯雖舊眷渥彌新

中謝

伏念臣奮跡孤生受知明

主越從羈旅之次寘在英游之間六年于茲一節以
守犯顏狂論仰翳全度之容率意妄行頻觸駭機之
發頃違表著退卽丘樊庶少避於滿盈亦苟逃於罪
戾恩緣謀帥詔使牧民雖公家之利無不爲粗識所
嚮然軍旅之事未之學終媿斯言曾坐席之未溫已
賜環之亟下自驚衰朽重歷禁嚴此蓋伏遇

皇帝陛下信順尚賢聰明稽古多士雜選皆洞照其

肺肝群胡跳梁已陰得其要領將開興運並用舊人
如臣等夷亦在比數臣敢不激昂於事洗滌其衷涉
世蹈憂患之途其身已老報君持忠義之節此志不
移

謝除兼侍讀表

召節始頒已冠六卿之列除書繼下亟從五學之游

拜命便蕃撫躬跼蹐

中謝

竊以顧問之職講讀爲榮

在漢褒絕業之功第叅陪於貴戚至唐修更侍之令
遂專用於耆儒洪惟本朝遠鑒前代御邇英之便

坐延勸學之近臣貴德上賢本以示四方之好惡分
章擿句又將質千載之是非必惟其人庶益於國伏
念臣聞道最晚涉世甚迂頃蒙特達之知頻侍清閑
之燕考 祖考已行之事每獲口陳誦春秋不刊之
書終慚膚引矧茲塞訥之素加以衰羸之餘復玷充
員益難塞責此蓋伏遇

皇帝陛下道惟天合德與日新能自得師者王豈清
光之可望智而好問曰聖猶多聞之是求乃緣舊恩
而及凡品臣敢不勉羞薄技務竭精思收之桑榆心

歟東隅之失出於涯涘魂驚北海之觀

辭免除叅知政事表

任重人微敢殫危悃恩隆命確未錫俞音更陳迫切
之辭仰瀆蓋高之聽

中謝

伏念臣章句之學拙於濟

時田野之資昧於謀國徒以四海至孤之跡曲荷九重特達之知徧歷高華曾微補發比膺召命復長銓曹方日俟於譴何遽叅陪於機政况風塵之警未息郊壘滋多而宵旰之慮益深朝綱猶紊束求誤及稱塞愈難伏望